

## Redakteursnota

In die Junie 2016-nommer van die *Tydskrif vir Geesteswetenskappe* het Andries Raath (2016:573-591) in die volgende artikel 'n gesprek oor politokratiese kommunitarisme begin:

Politieke en regsfilosofiese perspektiewe op politokratiese kommunitarisme: 'n diskoers met Danie Goosen en Koos Malan

Die fokus val op politieke kommunitarisme wat, anders as die wye ondersteuning wat *Ubuntu*-kommunitarisme in die regsliteratuur geniet, volgens Raath beperk gebly het tot die Afrikaanse literatuur. Soos aangedui in die subtitel word meer spesifiek, in 'n diskoers met Danie Goosen en Koos Malan, gekyk na die politieke en regsfilosofiese implikasies van politieke kommunitarisme. Volgens Raath (2016:574) het “die filosofiese hiate in die staats- en regsdenke van politokratiese kommunitarisme belangrike implikasies”, omdat kommunitiese politokrate nie daarin slaag om “die statisme van die liberale individualisme te oorkom en 'n normatiewe alternatief vir statisme, politieke universalisme en die absolutistiese staat te stel nie” (ibid.).

In hierdie rubriek tree Danie Strauss toe tot die “Debat oor die moderne staat” deur aan te voer dat die tekortkominge van sowel individualistiese (atomistiese) as universalistiese (holistiese) benaderings ondervang kan word “indien erns gemaak word met die ontiese beginsels van *soewereiniteit-in-eie-kring* en *universaliteit-in-eie-kring*”.

Sowel Danie Goosen as Koos Malan is van plan om repliek te lewer en hul toetrede tot die gesprek sal hopelik in die Desemberuitgawe geplaas word. Alle lesers van die *Tydskrif vir Geesteswetenskappe* word hartlik uitgenooi om deel te neem aan die debat. Beperk u debatsbydraes tot hoogstens 2 000 woorde. Indien u sou verkies om liever uitvoeriger by wyse van 'n navorsingsartikel te reageer sal dergelike bydraes aan die gewone prosedure van keuring onderhewig wees.

**Ina Wolfaardt-Gräbe**

Augustus 2016

# Die debat oor die moderne staat

*The debate on the modern state*

DANIE STRAUSS

Skool vir Filosofie

Noordwes-Universiteit

Potchefstroom Kampus

E-pos: dfms@cknet.co.za

## ABSTRACT

*The debate on the modern state*

*This brief partaking in the debate about law and state focuses on a number of deepening philosophical insights, inter alia regarding the difference between aspects and entities, the distinction between modal laws and type laws, and the nature of modal universality and typically specified universality. Succinct attention is also given to the one-sidedness of both individualistic (atomistic) and universalistic (holistic) approaches – shortcomings that could be transcended if the ontic principles of sphere-sovereignty and sphere-universality are taken seriously.*

## OPSOMMING

In hierdie saaklike toetreding tot die debat oor reg en staat word aandag geskenk aan enkele verdiepende wysgerige insigte, waaronder die verskil tussen aspekte en entiteite en die onderskeiding tussen modale wette en tipiese wette, tussen modale universaliteit en tipe-gespesifiseerde universaliteit. Aandag word ook kortliks aan die eensydigheid van beide individualistiese (atomistiese) en universalistiese (holistiese) benaderings gegee – tekortkominge wat te bowe gekom kan word indien erns gemaak word met die ontiese beginsels van soewereiniteit-in-eie-kring en universaliteit-in-eie-kring.

\*\*\*\*\*

Koos Malan en Danie Goosen ontwikkel hul samelewingsbeskouing teen die agtergrond van kommunitêre denkers soos Michael Sandel, Charles Taylor, Alisdair MacIntyre, Michael Walzer en Vernon van Dyke.<sup>1</sup> Hierdie bydrae tot die gesprek wil die aandag vestig op enkele onderliggende wysgerige onderskeidings en insigte wat die debat moontlik kan verruim.

Teenoor die Griekse gemeenskapsidee, soos vergestalt in die *polis* (stadstaat)<sup>2</sup> en wysgerig geartikuleer in die denke van Aristoteles, stel Malan en Goosen die moderne territoriale staat wat soms (negatief) met “staatligheid” of die *ideologie van die staat* gelykgestel word. Dit hang saam met die gegewe dat verskeie negatiewe trekke in die staatsfilosofiese denke van Hobbes, Locke en Rousseau volgens hierdie denkers in die moderne staat teruggevind word.

Na aanleiding van juridies geïnspireerde definisies van die staat skryf Malan byvoorbeeld dat hulle almal “die staatsteorie van Hobbes en nog meer van Locke” reflekteer: “Die staats-

<sup>1</sup> Die regsosioloog Robert A. Nisbet kan ook in hierdie konteks vermeld word. In sy gesprek met Pieter Duvenhage praat Goosen van ’n herontdekking van die “tradisionele Westerse metafisiese en politieke denke” – en dan vermeld hy figure soos Plato, Aristoteles, Cicero, Plotinus, Proclus, Dionysius die Areopagiet asook meer resente denkers soos Alasdair MacIntyre, Robert Spaeman, Josef Pieper, Hans Urs von Balthasar, John Milbank en Michael Sandel (sien Goosen 2016:242).

<sup>2</sup> ’n Kritiese ontleding van die Griekse stadstaat kan nagelees word by Raath (2016a:575 en verder). Vergelyk Strauss (2014) oor die plek van die staat in ’n gedifferensieerde samelewing.

definisies is deurlopend geskoei op 'n atomisties-liberale grondslag en neig sterk anti-kommunitêr” (Malan 2011:107). Die moderne staat, wat in abstrak-individualistiese terme beskryf word, huisves volgens Malan tewens geen egte *gemeenskap* nie.

Gunnar Myrdal openbaar reeds in 1932 'n goeie insig in die aard van individualistiese (atomistiese) en universalistiese (holistiese) benaderings waarmee die “politieke ekonomie” gekonfronteer word: die utilitaries-liberalistiese atomisme aan die een kant en die toenemend heterogeen-organiese benadering aan die ander kant (Myrdal 1932:87).

As alternatief word daar dan teenoor dergelike individualisties-atomistiese sienings prominensie aan die (organiese) geheel-dele relasie verleen – 'n benadering wat teruggryp na die denke van Aristoteles.

Agerliggend aan hierdie teëgestelde oriëntasies vind ons die algemeen-wysgerige probleem van eenheid en verskeidenheid. Goosen dui byvoorbeeld die “aard van die politieke werklikheid” aan “as die spel tussen eenheid en veelheid” (2016:223). In Engels word daar na die probleem van die *ene* en die *vele* verwys.<sup>3</sup> Die primêre wysgerige vraag hier is tweevoudig. Eerstens gaan dit oor die vraag na die “oorspronklike tuiste” van die terme “eenheid” en “veelheid” en in die tweede plek verwys dit na die vraag hoeveel “tuistes” daar in die werklikheid aanwesig is. Ons begin met 'n verduideliking van wat met “oorspronklike tuiste” bedoel word.

Eenheid en veelheid appelleer allereers op *getalsverhoudinge*. Daarom kan gesê word dat die terme *eenheid* en *veelheid* oorspronklik in die *getalsaspek* van die werklikheid aangetref word, dat hul oorspronklike *modale* tuiste aritmeties van aard is. Die term *modaal* is van die Latynse frase *modus quo* afgelei en dit word hier aangewend om na die verskillende (“veelheid”) *bestaanswyses*, *aspekte* of *modaliteite* wat ons in die werklikheid aantref te verwys.<sup>4</sup>

Verskeie verdere oorwegings kom hier na vore, soos: Hoeveel modale aspekte is daar? Is die aspekte uniek? Indien wel, is die unieke sin van die aspekte definieerbaar? Staan die verskillende aspekte in relasie tot mekaar (hang hulle wederkerig saam)?

Sonder om dit uitvoerig te verduidelik kan vermeld word dat daar voorlopig vyftien werklikheidsaspekte onderskei kan word,<sup>5</sup> dat elkeen inderdaad uniek en ondefinieerbaar is en dat die verskeidenheid modale aspekte onverbreeklik saamhang. Hierdie “uniekheid in samehang” beliggaam twee fundamentele ontiese beginsels, te wete die beginsel van *soewereiniteit-in-eie-kring* en die beginsel van *universaliteit-in-eie-kring*.

Natuurlik moet ook rekenskap gegee word van die verhouding tussen die pas vermelde verskeidenheid werklikheidsaspekte en die dimensie van konkrete (natuurlike) en samelewingsentiteite en prosesse. Alle entiteite en prosesse funksioneer in alle aspekte want die aspekte beliggaam immers die *wyses* waarop die verskillende dinge *bestaan* (dit is hul bestaanswyses).

Een implikasie van die onderskeiding tussen modaliteite en konkrete (aspek-veelsydige) entiteite is dat in alle wetenskaplike dissiplines tussen “aspek-begrippe” (modale begrippe/funksie-begrippe) enersyds en struktuur-tipiese “ding-begrippe” andersyds onderskei moet word.

In die fisika tref ons byvoorbeeld funksie-begrippe soos *massa*, *volume*, *beweging* en *krag* aan in onderskeiding van struktuur-tipiese ding-begrippe, waaronder *elementêre deeltjie*, *atoom*, *molekuul* en *makro-molekuul*. Binne die kultuur-historiese aspek, waarin ons *mag* of *beheersende vorming* in die oorspronklike sin daarvan kry, tref ons funksie-begrippe soos *historiese kontinuïteit*,

<sup>3</sup> Joseph Bracken kontekstualiseer hierdie probleem deur God daarby te betrek – dan handel dit oor “The One in the Many” – (sien Bracken 2001).

<sup>4</sup> Ons is ook vertrouwd met frases soos *modus vivendi* en *modus operandi*.

<sup>5</sup> Met name getal, ruimte, beweging, die fisiese, biotiese, sensitief-psigiese, logies-analitiese, kultuur historiese, die teken-aspek, die sosiale aspek, ekonomiese aspek, estetiese aspek, juridiese aspek, etiese aspek en die geloofsaspek.

*historiese kousaliteit, historiese ontwikkeling* (differensiasie en integrasie) en *historiese toerekening* aan, in onderskeiding van uiteenlopende tipes kultuur-historiese magsvorming (waaronder die kapitaalmag van 'n ekonomiese bedryfsonderneming, die kennismag van 'n unversiteit, die swaardmag van die owerheid en die mag van die Woord in 'n kerklike denominasie). Die modale universaliteit van die juridiese aspek omvat die tipiese wyse waarop individue en samelewings-vorme binne hierdie aspek funksioneer. Met appèl op die regsaspek kom ons ook juridiese funksie-begrippe soos *regsorde* (die eenheid in die veelheid regsreëls), die *juridiese geldingsgebied* van 'n wet, die handeling van 'n *kompetente regsorgaan*, *juridiese wilsvorming*, *juridiese toereken(ingsvat)baarheid* en die *wering van juridiese eksesse* teen.

Vanuit 'n ontologiese perspektief gesien weerspieël hierdie onderskeiding tegelyk die verskil tussen *modale wette* en *tipiese wette*. Die modale aspekte besit 'n *ongespesifiseerde universaliteit* terwyl die aard van verskillende tipes entiteite 'n *gespesifiseerde universaliteit* vertoon. Modale universaliteit bring tot uitdrukking dat alle moontlike klasse van dinge in beginsel in alle aspekte funksioneer. Bepaalde tipes entiteite is daarenteen beperk tot 'n *gespesifiseerde klas* van entiteite. Alle fisiese entiteite is onderworpe aan universele modale wette asook aan tipe-wette wat slegs op 'n *beperkte versameling van entiteite* van toepassing is. Wat universele modale wette betref hoef slegs aan die swaartekragwet en die eerste twee hoofwette van die termodinamika gedink te word (die wet van energie-konstansie en van nie-afnemende entropie). Wat tipe-wette betref, kan die atoom en die staat as voorbeelde geneem word. Die tipe entiteit wat ons identifiseer as 'n atoom korreleer met 'n tipe-wet vir 'n beperkte klas van entiteite. Hierdie wet (vir atoom-wees of staat-wees) is universeel want dit het betrekking op *alle* atome en alle state. Tog is hierdie universaliteit *gespesifiseerd* want nie alle entiteite is atome of state nie. Daarom is die tipe-wet vir staat-wees ook *gespesifiseerd universeel* – dit is van toepassing op *alle* state maar nie alles in die werklikheid is *state* nie.

Aangesien modale universaliteit daarop dui dat alle (tipies-verskillende) entiteite in alle aspekte funksioneer kan geen entiteit eksklusief op enige aspek *aanspraak* maak nie. Geen aspek *behoort* (geheel of gedeeltelik) aan enige entiteit nie.

Malan is egter van mening dat begrippe “soos die reg, ... gesag en soewereiniteit” “almal staatsverwant” is:

Bykans alle probleme van die politiek en van die mees sentrale probleme van die reg is heg met die staat ineengestremel en werk nolens volens met die staat as die uitdruklike of versweë grondslag en vertrekpunt. (Malan 2011:5)

Wanneer die reg egter as “staatsverwant” beskou word, is dit begryplik waarom Malan meen dat *reg* sy “grondslag en vertrekpunt” in die staat vind. Daarmee word nie alleen die modale universaliteit van die regsaspek misken nie maar ook die *oorspronklike* regsfunksie van die nie-staatlike samelewingsvorme. Aangesien Malan tereg daarop wys dat die term “staat” relatief laat op die toneel verskyn het (Malan 2011:7) sou gevra kon word of *reg* gevolglik nie ook *relatief laat* – eers saam met die staat – verskyn het nie?

Wat is die geval met die terme “gesag en soewereiniteit” wat ook “almal staatsverwant” is, soos Malan suggereer? Ons het reeds opgemerk dat die unieke sin van die kultuur-historiese aspek as *mag* of *beheersende vorming* aangedui kan word. Daarom vind die term “gesag” 'n tuiste in die kultuur-historiese aspek – waar ons moet onderskei tussen *mag oor dinge* ('n kultuur-historiese subjek-objek relasie) en *mag oor persone* ('n kultuur-historiese subjek-subjek relasie – meestal as *ampsgesag* aangedui). Soms word kortweg na *saak-kultuur* en *persoon-kultuur* verwys. Die term *soewereiniteit* word eweneens gebruik om bepaalde vorme van samelewings-*mag* aan te dui – maar dit kan nie eksklusief vir (of deur) die staat opgeëis word nie (al het Bodin, wat hierdie term in die moderne regs- en staatsleer ingevoer het dit probeer doen – vgl. Strauss 2014). Daarom

het Kuyper en Dooyeweerd tereg die uitdrukking *soewereiniteit-in-eie-kring* ingevoer om van *verskillend-gearde* samelewingsvorme se interne (mags-)bevoegdhede rekenskap te gee. Later sou Habermas, Rawls en Münch soortgelyke uitdrukkings vir hul rekening neem.

Münch wys daarop dat die uitgangspunt van die teoretiese debat in die 1980s in Weber se teorie van die rasionalisering van die moderne samelewing te vinde is. Daarvolgens sou sferen in die samelewing toenemend gelei word deur hul eie “inner laws”: in “Weber’s theory of the rationalization of modern society into spheres that are guided to an increasing extent by their inner laws” (Münch 1990:442).

Ten spyte daarvan dat Rawls se denke uiteen gebreek word deur die gelyktydige aanwesigheid van atomistiese en holistiese tendense (sien Strauss 2006) slaag hy tog soms daarin om bo hierdie dilemma uit te styg – naamlik wanneer hy besef dat verskillende wette van toepassing is op onderskeie soorte subjekte (dit wat ons hierbo as *tipe-wette* aangedui het): “But it is the distinct purposes and roles of the parts of the social structure, and how they fit together, that explains there being different principles for distinct kinds of subjects” (Rawls 1996:262).

In sy bespreking van globalisasie verbind Habermas die “klassieke leerstuk van die staat” aan die idee van *private lewensfeer*: “the state maintains law and order within the borders of its own territory and guarantees security for citizens within their own private spheres of life” (Habermas 2001:81).

Die vraag is natuurlik: hoe moet individualistiese (atomistiese) en universalistiese (holistiese) samelewingsopvattinge verstaan word? Hierdie vraag bring ons in aanraking met die rol van ’n grondnoemer, vergelykingsnoemer of verklaringsbeginsel in terme waarvan die verskeidenheid werklikheidsaspekte verantwoord word.

’n Individualistiese (atomistiese) benadering wil alles vanuit die diskrete perspektief van ’n getalsmenigvuldigheid verklaar; dit wil alles tot blote optelsomme herlei. Universalistiese (holistiese) sienings kies die ruimte-aspek as verklaringsbeginsel waarin die oorspronklike sin van die geheel-dele relasie aangetref word. Individualistiese en universalistiese denkers gebruik ook dikwels analogieë van getal en ruimte in ander werklikheidsaspekte om hul teoretiese perspektief deur te voer. Myrdal verwoord hierdie teenstelling tussen atomisme en organisisme soos volg: “Die eerste geval betref uitsluitlik ’n suiwer aritmetiese som terwyl ons in die ander geval met ’n onmiddellike totaliteit [*Ganzen*] te doen het, ’n geheel wat nie bloot gelyk is aan die som van sy dele nie” (Myrdal 1932:87).<sup>6</sup>

Nisbet verduidelik byvoorbeeld die spanning tussen ’n atomistiese-meganiese samelewingsbeskouing en ’n erkenning van gemeenskapsverbintenisse met verwysing na Tönnies se onderskeiding tussen *Gemeinschaft* en *Gesellschaft* (sien Tönnies 1887).

Similarly, some of the German sociologists of the late nineteenth century called attention to the processes of modern history that have led to an atomization or mechanization of the primary social relationships. Tönnies expressed this as a continuous weakening of the ties of *Gemeinschaft* – the communal ties of family, guild, and village – and a constant maximization in modern times of the more impersonal, atomistic, and mechanical relationships of what he called *Gesellschaft*. (Nisbet 1962:78)<sup>7</sup>

<sup>6</sup> Let egter daarop dat hoewel holistiese benaderings dikwels ’n organistiese (of: organismiese) weg bewandel iemand soos Herbert Spencer ’n individualistiese “organistiese” denker is. Spencer verduidelik dat sy doel nie ’n toename in gesaghebbende beheer is nie, maar ’n vermindering daarvan: “A more pronounced individualism, instead of a more pronounced nationalism, is its ideal” (Spencer 1968:22).

<sup>7</sup> Bodin sien byvoorbeeld families en korporasies as dele van die staatsgeheel (Bodin 1981:521).

Die eensydighede van (aritmetiese, organiese of sosiale) *individualisme* en (ruimtelik-georiënteerde, organiese of sosiale) *universalisme* kan alleen vermy word deur erkenning te verleen sowel aan die uniekheid van elke aspek (*soewereiniteit-in-eie-kring*) as die onverbreeklike samehang tussen die verskillende modale aspekte (*universaliteit-in-eie-kring*).

Die uitwerking van hierdie alternatief sal egter in 'n paar ander artikels gedoen word. Daarin sal onder meer aangetoon word dat inter-individuele maatskapsverhoudinge altyd met (supra-) individuele gemeenskaps- en verbandsverhoudinge gekorreleer is. Daaruit sal onder andere blyk dat die opvatting van Goosen, naamlik dat “die politieke geheel as ’n gemeenskap van gemeenskappe verstaan moet word, en nie bloot as ’n kontrak van vryswewende individue nie” (Goosen 2016:247), tot ’n miskening van die aard van maatskapsverhoudinge lei – en tesame daarmee nie reg aan die aard van die burgerlike privaatreg kan laat geskied nie.<sup>8</sup>

## BIBLIOGRAFIE

- Alexander, J.C. 1990. *Differentiation Theory and Social Change*. Co-editor Paul Colomy, New York: Columbia University.
- Bodin, J. 1981. *Sechs Bücher über den Staat*. Buch I-III. Vertaal met opmerkinge deur Bernd Wimmer, Ingelei en opnuut uitgegee deur P.C. Meyer-Tasch. München: Verlag C.H. Beck.
- Bracken, J.A. 2001. *The One in the Many. A Contemporary Reconstruction of the God-World Relationship*. Grand Rapids: William B. Eerdmans.
- Duvenhage, P. 2016. *Afrikaanse Filosofie, Perspektiewe en dialoë*. Bloemfontein: Sun Press.
- Goosen, D. 2013. Monsters en mense: Oor die geestelike en haar moderne afwesigheid. *Tydskrif vir Geesteswetenskappe*, 53(4):516-528.
- Goosen, D. 2016. Die werklikheid as deelnemende gebeurde, of die verwikkelde samehang tussen eenheid en veelheid. In: Duvenhage (2016:221-248).
- Habermas, J. 1981. *Theorie des kommunikativen Handelns*. Volume 1. Frankfurt am Main: Suhrkamp Verlag (Fourth revised edition, 1987 – ‘Taschenbuch’ edition 1995).
- Habermas, J. 2001. *The Postcolonial Constellation, Political Essays*. Cambridge, Massachusetts: Polity Press.
- Malan, K. 2011. *Politokrasie: 'n Peiling van die dwanglogika van die territoriale staat en gedagtes vir 'n antwoord daarop*. Pretoria: Pretoria University Law Press.
- Müch, R. 1990. Differentiation, Rationalization, Interpenetration: The Emergence of Modern Society, in: Alexander (1990:441-464).
- Myrdal, G. 1932. *Das politische Element in der National ökonomischen Doktrinbildung*. Berlin: Junker und Dünhaupt Verlag.
- Nisbet, R.A. 1962. *Community and Power*. [formerly *The Quest for Community*]. New York: Oxford University Press.
- Raath, A.W.G. 2016. Regs- en staatsosiologiese grondslae van politokratiese kommunitarisme. 'n Gesprek oor enkele aspekte van die meta-etiese historisme in die Afrikaanse politieke en regsliteratuur. *Tydskrif vir Christelike Wetenskap*, 2016 (1):55-90.
- Raath, A.W.G. 2016a. Politieke en regsfilosofiese perspektiewe op politokratiese kommunitarisme: 'n Diskoers met Danie Goosen en Koos Malan. In: *Tydskrif vir Geesteswetenskappe*, 56 (No. 2-2):573-591. doi.10.17159/2224-7912/2016/v56n2-2a4.
- Rawls, J. 1996. *Political Liberalism*. Hersiene Uitgawe. Cambridge: Harvard University Press.
- Strauss, D.F.M. 2006. The mixed legacy underlying Rawls's Theory of justice. In: *Journal for Juridical Science*, 31(1):61-79.
- Strauss, D.F.M. 2014. The Place of the State in a Differentiated Society: Historical and Systematic Perspectives. In: *Politikon: South African Journal of Political Studies*, 41(1):121-139, doi:10.1080/02589346.2014.885681.
- Tönnies, F. 1972. *Gemeinschaft und Gesellschaft*, Darmstadt: Wissenschaftliche Buchgesellschaft (Eerste druk, 1887).

<sup>8</sup> Die geheel-aard van 'n gemeenskap speel 'n sentrale rol in die denke van Goosen (sien Goosen 2013:517-521 en 525-527; asook Goosen 2016:230-231, 244).